

七十二家集

謝光祿集序

諸謝羣翔希逸稍晚出而
折衷諸父據地絕勝觀其
咄嗟吐納俱成令音國體
朝常多所匡贊儻雅之際
別有冲融和平之中時存

耿介名播北土豈偶然哉
吏部尚書總統羣彙顏峻
主嗔而與人官也賄故也
希逸笑而不希人官蓋衣
來既清干請道隔自不妨
以溫然接物耳遊政推門

溷墨勅乃闕又何個僅也
希逸文章四百餘篇余輯
而存之僅得四卷明月賦
以梁選傳森馬賦以國史
傳赤鸚鵡盛為袁洪所推
今孫敷語可為款息表秦

諸體蔚矣其文哀艱尋篇
泣然淒婉殷實妃誄幾以
賈禍然文字之美橫絕古
今矣殷淝儀傳又稱莊作
表策文都不傳寫帛墨為
為貴之所存謚策寔之斷

簡不聞哀樂定即誅之訖
耶抑別有哀樂亡湮沒耶
作述之際人所難至而希
逸以弘微為父子以風月
景山水為父子前後輝映
源迴緒長希逸法詠不甚

為果人推戴無齋武岡王
僕射當今誰能為五言詩
王曰謝朓得父膏腴夫得
父膏腴便可屈指希側則
阿父詩亦既齊世所重矣
庶乎早秋張燮識

謝光祿集目錄

卷之一

賦

月賦

舞馬賦

赤鸚鵡賦

悅曲池賦

樂府

宋明堂歌九首

迎神歌

登歌

歌太祖文皇帝

歌青帝

歌赤帝

歌黃帝

歌白帝

歌黑帝

送神歌

宋世祖廟歌一首

世祖孝武皇帝歌

宣太后歌

詩

烝齋應詔

和元日雪花應詔

七夕夜詠牛女應制

侍宴蒜山

侍東耕

遊豫章西觀洪崖井

自潯陽至都集道里名爲詩

北宅祕園

喜雨

江都平解嚴

從駕頓上

八月侍華林曜靈殿八關齋

懷園引

山夜愛

聯句

華林都亭山水聯句效栢梁體

卷之二

詔

宋明帝卽位赦詔

表

上搜才表

爲八座江夏王請封禪表

又

改定刑獄表

請弘風則表

太子元服上至尊表

太子元服上太后表

謝賜貂裘表

東海王讓司空表

讓中書令表

讓吏部尚書表

奏

上封禪儀註奏

封皇弟奏

改封長公主奏

卷之三

章

爲比中郎謝兼司徒章

爲比中郎拜司徒章

啓事

與世祖啓事

牋

與大司馬江夏王義恭牋

書

爲朝士與袁顗書

昨還帖

議

索虜互市議

贊

竹贊

哀策文

宋孝武帝哀策文

皇太子妃哀策文

宣貴妃謚冊文

誄

孝武宣貴妃誄

黃門侍郎劉琨之誄

墓誌銘

豫章長公主墓誌銘

司空何尚之墓銘

附錄

謝莊傳

梁沈約

謝莊傳

唐李延壽

與謝尚書莊三連句

宋鮑照

遺事

集評

謝光祿集卷之一

宋陳郡謝莊希逸著

明閩漳張熒紹和纂

賦

月賦

陳王初喪應劉端憂多暇綠苔生閣芳塵凝榭
悄焉疚懷弗怡中夜乃清蘭路蕭桂苑騰吹寒
山弭蓋秋坂臨濬壑而怨遙登崇岫而傷遠于
時斜漢左界北陸南躔白露曖空素月流天沈

吟齊章殷勤陳篇抽毫進牘以命仲宣仲宣跪
而稱曰臣東鄙幽介長自丘樊昧道慚學孤奉
明恩臣聞沈潛旣義高明旣經日以陽德月以
陰靈擅扶桑於東沼嗣若英於西冥引玄兔於
帝臺集素娥於后庭朒朏警闕朏魄示冲順辰
通燭從星澤風增華台室揚彩軒宮委照而吳
紫昌淪精而漢道融若夫氣霽地表雲歛天末
洞庭始波木葉微脫菊散芳於山椒鴈流哀於
江瀕升清質之悠悠降澄暉之藹藹列宿掩縹

長河韜映柔祗雪凝圓靈水鏡連觀霜縞周除
冰淨君王乃厭晨歡樂宵宴收妙舞弛清縣去
燭房卽月殿芳酒登鳴琴薦若乃涼夜自淒風
篴戍韻親懿莫從羈孤迺進聆臯禽之夕聞聽
朔管之秋引於是絲桐練響音容選和徘徊房
露惆悵陽阿聲林虛籟淪池滅波情紆軫其何
託愬皓月而長歌歌曰美人邁兮音塵闕隔千
里兮共明月臨風歎兮將焉歇川路長兮不可
越歌響未終餘景就畢滿堂變容廻遑如失又

稱歌日月旣沒兮露欲晞歲方晏兮無與歸佳
期可以還微霜霑人衣陳王曰善乃命執事獻
壽薦璧敬珮玉音復之無斁

舞馬賦

天子馭三光總萬寓挹雲經之留憲裁河書之
遺矩是以德澤上昭天下漏泉符瑞之慶咸屬
榮懷之應必躔月晷呈祥乾維效氣賦景河房
承靈天駟陵原郊而漸影躍采淵而泳質辭水
穴而南僊去輪臺而東暨乘玉塞而歸寶奄芝
庭而獻祕及其養安騏校進駕龍涓輝大馭於
國皂賁上襄於帝閑超益野而踰綠地軼蘭池
而轢紫燕五王晦其術十氏情其玄東門豈或

狀西河不能傳旣秣苞以均性又佩衡以崇躅
卷雄神於綺文蓄奔容於帷燭蘊籥雲之銳景
戢追電之逸足方疊鎔於丹鎬亦聯規於朱駁
觀其雙壁應範三封中圖玄骨蒲燕室虛陽理
竟潛策紆汗飛赭沫流朱至於肆夏已升采齊
旣薦始徘徊而龍俛終沃若而鸞吟迎調露於
飛鍾赴承雲於驚箭寫秦垌之彌塵狀吳門之
曳練窮虞庭之蹈蹠究遺野之環袞若夫蹠實
之態未卷凌遠之氣方攄歷岱野而過碣石跨

滄流而軼姑餘朝送日於西坂夕歸風於北都
尋瓊宮於倏瞬望銀臺於須臾若乃日宣重光
德星昭衍國稱梁岱佇蹕史言壇場望踐鄙上
之瑞彰江間之禎闡榮鏡之運旣臻會昌之曆
已辨感五絲之程符鑒群后之薦典聖主將有
於東嶽禮也於是順斗極乘次躔戒懸日於
昭旦命月題於上年駢駢翼翼泛脩風而浮慶
煙肅肅雍雍引八神而詔九仙下齊郊而掩祀
林集羸里而降祊田蒲軒次獻瑄璧承鬯金檢

茲發王牒斯刊盛節之義洽升中之禮殫億兆
悅精祇歡聆萬歲於曾岫燭神光於紫壇是以
擊轅之蹈撫埃之舞相與而歌曰聳朝蓋兮泛
晨霞靈之來兮雲漢華山有壽兮松有茂祚神
極兮貺皇家然後悟聖朝之績號慶榮之烈比
盛乎天地爭明乎日月茂實冠於胥庭鴻名邁
於勛發業底於告成道臻乎報謁巍巍乎蕩蕩
乎民無得而稱焉

赤鸚鵡賦

徒觀其柔儀所踐蘋藻所挺華景夕映容光晦
鮮惠性昭和天機自曉審國音於寰中達方聲
於裔表及其雲移霞峙霞委雪翻陸離輦漸容
裔鴻軒躍林飛岫嶼若輕電溢煙門集場棲圃
曄若天桃被玉園至於氣淳體浮霧下崖沈月
圖光於綠水雲寫影於青林邇還風而聳翩霏
清露而調音

悅曲池賦

北山兮黛柏南谿兮潁石潁岸兮若虹黛樹兮
如畫暮雲兮十里朝霞兮千尺步東池兮夜未
久卧西窓兮月向山引一息於菟內擾百緒於
眼前

樂府

宋明堂歌九首

通典曰建元元年使謝莊造郊廟舞樂
明堂諸樂歌詩南齊書樂志曰明堂辭
五帝漢郊祀歌皆四言宋孝武使謝莊
造辭莊依五行數木數用三火數用七
土數用五金數用九水數用六周頌我
將祀文王言皆四其一句五一句七莊
歌太祖亦無定句

迎神歌

地紐謐乾樞回華蓋動紫微開旌蔽日車若雲
駕六龍乘綢繡曄帝京輝天邑聖祖降五靈集

構瑤彤聳珠簾漢拂幌月棲檐舞綴暢鍾石融
駐飛景鬱行風懋粢盛潔牲牷百禮肅群司虔
皇德遠大孝昌貫九幽洞三光神之安解玉鑾
景福至萬寓歡

登歌

雍臺辨朔澤宮練辰一作潔一作火夕照明水朝陳
六瑚賁室八羽華庭昭事先聖懷濡上靈肆夏
戒敬升歌發德永固鴻基以綏萬國

歌太祖文皇帝

維天爲大維聖祖是則辰居萬寓綴旒下國內
靈八輔外光四瀛菁宮仰蓋日館希旌複殿留
景重檐結風刮檻接緯達響承虹設業設虞在
王庭肇禮祀克配乎靈我將我享維孟之春以
孝以敬以立我蒸民

歌青帝

參映夕駟照晨靈乘震司青春鴈將向桐始蕤
柔風舞暄光遲萌動達萬品新潤無際澤無垠
歌赤帝

龍精初見大火中朱光比至圭景同帝在在離
寔司衡水雨方降木槿榮庶物盛長咸殷阜恩
覃四冥被九有

歌黃帝

履建

宋書作良

宅中寓司繩御

宋作總

四方裁化遍寒

燠布政周炎涼景麗條可結霜明冰可折飢風

扇朱辰白雲流素節分至乘結

宋作涇

晷格閉集

恒度帝運緝萬有皇靈溎國步

歌白帝

百川如鏡天地爽且明雲冲氣舉德盛在素精
木葉初下洞庭始揚波夜光徹地翻霜照懸河
庶類收成歲功行欲寧浹地奉渥罄宇承秋宋作
帝靈

歌黑帝

歲月旣晏方馳靈乘坎德司規玄雲合晦鳥

一作

歸路白雲

一作雪

繁亘天涯雷在地時未光飾國

典閉關梁四節遍萬物殿福九域祚八鄉晨晷
促夕漏延太陰極微陽宜鵲將巢冰已解氣濡

水風動泉

送神歌

蘊禮容餘樂度靈方留景欲暮開九重肅五達
鳳參差龍已沫雲旣動河旣梁萬里照四空香
神之車歸清都璇庭寂玉殿虛潛化凝孝風熾
顧靈心結皇思

宋世祖廟歌二首

世祖孝武皇帝歌

帝錫二祖長世多祐於穆睿考龔聖承矩玄極

弛馭乾紐墜緒關我皇維締我宗

一作宋

宇刷定

四海肇禋神京復禮輯樂敷馬墮城澤初九有
化浮八瀛慶雲承掖甘露飛甍肅肅清廟徽徽
闕宮舞蹈象德笙磬陳風黍稷非盛明德惟崇
神其歆止降福無窮

宣太后歌

稟祥月輝毓德軒光嗣徽嫺內思媚周姜母臨
萬寓訓藹紫房朱玄玉籥式載瓊芳

聯句

華林都亭曲水聯句效栢梁體

九宮盛事予旒纁宋孝武帝三輔務根誠難亮楊州刺史

江夏王策拙粉鄉慙恩望南徐州刺史折衝莫

效興民謗領軍將軍侍禁衛儲恩踰量太子右

臣謬叨寵九流曠吏部尚書喉唇廢職方思讓侍

臣明筆直繩天威諒御史中丞

臣顏師伯

詩

登齊應詔

以下
五言

霜露凝宸感肅儉動天引西郊滅溼旃

一作
烟旃東

溟起昭晉舞風泛龍常輪霞浮玉輶紫階協笙

鏞金途展應棟方見六詩和永聞九德潤觀生

識幸渥睇服慙輶

一作
輶恪

和元日雪花應詔

從候昭神世息燧應頌道玄化盡天秘凝功畢
地寶笙鏞流七始玉息承三造委霰下璇璣疊

雪翻瓊藻積曙境寓明聯萼千里杲掩映順雲
懸搖裔從風掃發貺燭姪前騰瑞光圖表澤厚
見身末恩踰悟生眇竦誠岱駕肅側志梁鑾矯
七夕夜詠牛女應制

輟機起春暮停箱動秋杳璇居照漢右芝駕肅
河陰容裔泛星道逶迤濟煙潯陸離迎宵佩倏
爍望昏簪俱傾環氣怨共歔浹年心珠毀釭未
沫瑤庭路已深夕清豈淹拂弦輝無久臨

侍宴蒜山

龍旌拂綉長風蓋起流雲轉蕙方因委層華正
氛氲煙竟出郊遠霧罷江天分調石飛延露裁
金起承雲

侍東耕

肅鑣奉晨發恭帶厠朝聞仙鄉降朱靄神郊起
青雲陰臺承寒彩陽樹迎初熏觀德欣臨藉瞻
道樂遊汾

遊豫章西觀洪崖井

幽願平生積野好歲月彌捨簪神區外整褐靈

言
鄉垂林遠炎天隔山深白日虧游陰騰鶴嶺飛
清起鳳池隱曖松霞被容與澗煙移將遂丘中
性結駕終在斯

自潯陽至都集道里名爲詩

山經亟旋覽水牒劾敷尋
稽惻誠淹留煙臺信
遐臨翔州凝寒氣秋浦結清陰
眇眇高湖曠遙
遙南陵深青溪如委黛黃沙似舒金
觀道雷池
側訪德茅堂陰魯顯闕微迹秦良滅
芳音訊遠
博望崖採賦梁山岑崇館非陳宇
茂苑豈舊林

北宅祕園

夕天霽晚氣輕霞澄暮陰微風清幽幌餘日照
青林收光漸牕歇窮園自荒深綠池翻素景秋
槐響寒音伊人儻同愛絃酒共樓尋

喜雨

燕起知風舞礎潤識雲流冽泉承夜漑零雨望
晨浮合穎行盛茂分穗方盈疇

江都平解嚴

肅旗簡廟律聳鉞暢乾靈朝晏推物泰通渥抃

身寧擊轅歌至世撫壤頌惟馨

從駕頓上

中權臨楚路前茅望吳雲
冀馬依風蹠邊簫當夜聞

八月侍華林曜靈殿八關齋

玉桴乘夕遠金枝終夜舒
澄淳玄化闡希微寂理孚

懷園引

以上
雜言

鴻飛從萬里飛飛河岱起
辛勤越霜霧聯翩邈

江汜去舊國遺舊鄉舊游悠且長迴首瞻東路
延翻向秋方登楚都入楚關楚地蕭瑟楚山寒
歲去冰未已春來鴈不還風蕭幌兮露濡庭漢
水初綠柳葉青朱光藹藹雲英英離禽啾啾又
歲鳴菊有秀兮松有蕤憂來年去容髮衰流陰
逝景不可追臨堂危坐悵欲悲試託意兮向芳
蓀心綿綿兮屬荒樊想綠蘋兮旣冒沼念幽蘭
兮已盈園天桃晨暮發春鶯旦夕喧青苔蕪石
路宿草塵蓬門

山夜憂

庭光盡山明歸流風乘軒卷明月緣河飛淵鳥
鳴兮夜蟬清橘露靡兮蕙煙輕淩別浦兮值泉
躍經喬木兮遇援驚南臯別鶴行佇漢東隣孤
管入青天沈疴白髮共急日朝露過隙詎賒年
年旣去兮髮不還金膏玉液豈留顏廻舫拓繩
戶收棹掩荆關

謝光祿集卷之二

宋陳郡謝莊希逸著

明閩漳張爕紹和纂

詔

宋明帝卽位赦詔

高祖武皇帝德洞四瀛化綿九服太祖文皇帝
以大明定基世祖孝武皇帝以下武寧亂日月
所照梯山航海風雨所均削衽襲帶所以業固
盛漢聲溢隆周子業凶器自天忍悖成性人面

獸心見於齟日反道敗德著自比年其狎侮五
常怠棄三正矯誣上天毒流下國寔開闢所未
有書契所未聞再罹過密而無一日之哀齊斬
在躬方深比里之樂虎兇難匿憑河必彰遂誅
滅上宰窮豐逆之酷虐害國輔究拏戮之刑子
鸞同生以昔憾殄殪敬猷兄弟以睚眦殲夷徵
逼義陽將加屠膾陵辱戚藩檟楚妃主奪立左
右竊子置儲肆酗于朝宣淫于國事穢東陵行
汙飛走積愆罔極月月滋深比遂圖犯玄宮志

窺題湊將肆梟獍之禍騁商頓之心又欲鳩毒
崇憲虐加諸父事均宮闈聲遍國都鴟梟小豎
莫不寵暱朝廷忠誠必加戮挫收掩之旨虓虎
結轍掠奪之使白亦相望百僚危氣首領無有
全地萬姓崩心妻子不復相保所以鬼哭山鳴
星鉤血降神器殆於馭索景祚危於綴旒朕假
寐凝憂泣血待旦慮大宋之基於焉而泯武文
之業將墜于淵賴七廟之靈藉八百之慶巨猾
斯殄鴻沴時褰皇綱絕而復紐天緯缺而更張

猥以寡薄屬承乾統上緝三光之重俯顧庶民
之艱業業矜矜若履米谷思與億兆同此維新
可大赦天下改景和元年爲泰始元年賜民爵
二級鰥寡孤獨不能自存者穀人五斛逋租宿
債勿復收犯鄉論清議贓污淫盜並悉洗除長
徒之身特賜原遣亡官失爵禁錮舊勞一依舊
典其昏制謬封並皆刊削

表

上揆才表

臣聞功照千里非特燭車之珍德柔隣國豈徒
祕璧之貴故詩稱殄瘁誓述榮懷用能道臻無
積化至恭已伏惟陛下膺慶集圖締寓開縣夕
爽選政昃旦調風采言厝輿觀謠仄遠斯實辰
階告平頌聲方製臣竊惟隆陂所漸治亂之由
何嘗不興資得才替因失士故楚書以善人爲
寶虞典以則哲爲難進選之軌旣弛中代登造

之律未聞當今必欲崇本康務庇民濟俗匪更
恣懣奚取九成升厯中陽英賢起於徐沛受錄
白水茂異出於荆宛寧二都智之所產士噢才
之所集實遇與不遇用與不用耳今大道光亨
萬務俟德而九服之曠九流之艱提鈞懸衡委
之選部一人之鑒易限而天下之才難原以易
限之鑒鏡難原之才使國罔遺授野無滯器其
可得乎昔公叔與僕同升管仲取臣於盜趙文
非親士疎嗣祁奚豈諂讐比子茹茅以彙作範

前經舉爾所知式昭往牒且自古任薦賞罰弘
明成子舉三哲而身致魏輔應侯任二士而已
捐秦相曰季稱冀缺而疇以田采張敦進陳湯
而坐以襦爵此先事之盛准亦後王之彝鑒如
臣愚見宜普命大臣各舉所知以付尙書依分
銓用若任得其才據主延賞有不稱職宜及其
坐重者免黜輕者左遷被舉之身加以禁錮年
數多少隨愆議制若犯大辟則任者刑論又政
平訟理莫先親民親民之要寔歸守宰故黃霸

治潁川累稔杜畿居河東歷載或就加恩秩或
入崇輝寵今蒞民之職自非公私必應代換者
宜遵六年之制進獲章明庸墮退得民不勤擾
如此則下無浮謬之愆上靡棄能之累考績之
風載泰樞薪之歌克昌臣生屬亨路身漸鴻猷
遂得奉詔左右陳愚於側敢露芻言懼氛恒典

爲八座江夏王請封禪表

惟皇天崇稱大道始行批讓迄于有晉雖聿脩
前緒而跡淪言廢蔑記於竹素者焉可單書紹
乾維建徽號流風聲被絲管自無懷以來可傳
而不朽者七十有四君罔仁厚而道滅鮮義澆
而德宣鍾律之先曠世綿絕難得而聞丘索著
明者尙有遺炳故易稱先天弗違後天奉時蓋
陶唐姚姒商姬之主莫不由斯道也是以風化
大洽光熙于後炎漢二帝亦踵曩則因百姓之

心聽輿人之頌龍駕帝服鏤玉梁甫昌言明稱
告成上靈況大宋表祥唐虞受終素德出龍啓
符金玉顯瑞異采騰於軫墟紫煙藹於邦甸錫
冕兆九五之徵文豹赴天曆之會誠二祖之幽
慶聖后之冥休道冠軒堯惠深亭毒而猶執冲
約未言封禪之事四海竊以愿焉臣聞惟皇配
極惟帝祀天故能上稽乾式照臨黔首協和穹
昊膺茲多福高祖武皇帝明並日月光振八區
拯已溺之晉濟橫流之世撥亂寧民應天受命

鴻徽洽于海表威稜震乎沙外太祖文皇帝體
聖履仁述業興禮正樂頌作象曆明達通於神
祇玄澤被乎上下仁孝命世叡武英挺遭運屯
否三才湮滅廼龍飛五洲鳳翔九江身先八百
之期斷出人鬼之表慶煙應高牙之建風耀符
發迹之辰親翦凶逆躬清昏盞天地革始夫婦
更造豈與彼承業繼緒拓復禹跡車一其軌書
罔異文者同年而議哉今龍麟已至鳳凰已儀
比李已實靈茅已茂雕氣降雩於宮榭珍露皇

味於禁林嘉禾積穗於殿薨連理合幹於園禦
皆耀質離宮植根蘭闕至夫霜毫玄文素飴頽
羽泉河山嶽之瑞草木金石之祥方畿憬塗之
謁抗驛絕祖之奏彪炳雜沓粵不可勝言太平
之應茲焉富矣宜其從天人之誠遵先王之則
備萬乘整法駕脩封泰山塵玉帛趾延喬松於
東序詔韓岐於西廂麾天關使啓關謁紫宮朝
太一奏鈞天詠雲門賡揚幽奧超聲前古豈不
盛哉伏願時命宗伯具茲典度

又

江淮鄙上之使結軌于壁門西鵝北采之譯相
望於道路

改定刑獄表

臣聞明慎用刑獄存姬典哀矜折獄實暉呂命
罪疑從輕旣前王之格範寧失弗經亦列聖之
恒訓用能化致升平道臻恭已逮漢文傷不辜
之罰除相坐之令孝宣倍深文之吏立鞠訊之
法當是時也號令刑存陛下踐位親臨聽訟億
兆相賀以爲無冤民矣而比囹圄未虛頌聲尙
缺臣竊謂五聽之慈弗宜於宰物三宥之澤未
洽於民謠頃年軍旅餘弊劫掠猶繁監司計獲

多非其實或規免咎不慮國患楚對之下鮮不
誣濫身遭鈇鑕之誅家嬰孥戮之痛比伍同閭
莫不及罪是則一人罰謬坐者數十昔齊女告
天臨淄臺殞孀婦冤戮東海愆陽此皆符變靈
祇初咸景緯臣近兼訊見重囚八人旋觀其初
死有餘罪詳察其理實並無辜恐此不少誠可
怵惕也舊官長竟囚畢郡遣督郵案驗仍就施
刑督郵賤吏非能異於官長有案驗之名而無
研究之實愚謂此制宜革自今入重之囚縣考

正罪以事言郡并送囚身委二千石親臨覈辯
必收聲吞釁然後就戮若二千石不能決乃度
廷尉神州統外移之刺史刺史有疑亦歸臺獄
必令死者不怨生者無恨庶鬻棺之諺輟歎於
終古兩造之察流詠於方今臣學闇申韓才寡
治術輕陳庸管懼乖國憲

請弘風則表

詔云貴戚競利興貨塵肆者悉皆禁制此實允
恩民聽其中若有犯違則應依制裁糾若廢法
申恩便爲令有所屈此處分伏願深思無緣明
詔既下而聲實乖爽臣愚謂大臣在祿位者尤
不宜與民爭利不審可得在此詔不拔葵去織
實宜深宏

太子元服上至尊表

伏惟皇太子殿下明兩承乾元良作貳抗法迂
身英華自遠樂以脩中禮以治外三善克懋德
成教尊今日昭辰顯加元服對靈祇之望儔上
庠之歡率天罄世莫不載躍

太子元服上太后表

離景承宸樞光陪極毓問東華龍英上序樂正
歌風司成頌德清明神鏡溫文在躬練日簡辰
顯被元服懋三王之教燭少陽之重

謝賜貂裘表

臣莊言主衣黃達宣勅賜臣貂裘匪發枉開玄
華有曜靡虛榮毒黠鑑自凝固以綵越綴輦光
逾緝驚臣聞嚙笑不妄韓裳勿假續有昭庸楚
續爰建臣歡忭自歌而同委衾之澤勤勞未報
而叨解裘之寵空荷榮施徒賁微軀承殊恩必
識服以淪生銘悅之情罔知所寘臣受假無由
躬拜謹遣表

東海王讓司空表

臣側觀前載與窺洪典三事之授惟帝其難臣
乘少籍長久分踰涯量出滿入泰每究榮光不
悟乾燭方遠義路同遺下參弘化上尸燮理自
非德仍具瞻聲庶民諫未有妄臻此澤空集茲
靈

讓中書令表

伏惟陛下登取震維臨齊璿政澤與風翔恩綏
雲動臣聞璧門天邃鳳沼神深絲綸王言出納
帝命自非望允當時譽宣庠塾未有謬垂曲寵
容席茲榮在於平壯猶不可勉况今綿痼百志
俱淪

讓吏部尙書表

招才琴劍之上取士歌牧之中終能克夷景命
榮懷萬宇豈容先私首曲近有經過且不習冠
制趙客興鑒未聞統馭鄭臣有規匪侮身譏

奏

上封禪儀註奏

臣聞崇號建極必觀俗以樹教正位居體必採
世以立言是以重代列聖咸由厥道玄勲上烈
融章未分鳴光委緒歇而罔藏若其顯謚騰軌
則系綴聲采徵畧聞聽爰洎姬漢風流尙存遺
芬餘榮綿映紀緯雖年絕世祀代革精華可得
騰金綵奏玉潤鏤迹以燠今鑄德以麗遠而四
望埋禋歌之禮日觀弛修封之容豈非神明之

業難崇功基之迹易泯自茲以降訖于季末莫
不欲英弘徽位詳固洪聲豈徒深默修文淵幽
馭世而已諒以滕非虛奏書匪妄埋擊雨恕神
淳廕復樹安得紫壇肅祇竹宮載竚散火投郊
流星奔座寶緯初基厭靈命曆德振弛維功濟
淪象玄浸紛流華液幽澗規存永馭思詳樹遠
太祖文皇帝以啓邁泰運景望震凝采樂調風
集禮宣度祖宗相映軌迹重聊聖上韞籙蕃河
峙朔衡漢金波掩照華耀停明運動時來躍飛

風舉澄氛海岱開景中區歆神還靈頽天重耀
儲正凝位於兼明袞嶽蕃華於元列故以祥映
昌基繫發篆素重以班朝待典節令詳儀纂綜
淪蕪揆騰委逸奏玉郊宮禋珪玄峙景集天廟
脉壤祥農節至昕陽川丘夙禮網威巡馳表綏
中甸史流其詠民挹其風於是涵迹視陰振聲
威響歷代之渠沈望內安侯之長賢王入侍
殊生詭氣奉俗還鄉羽族卉儀懷音革狀邊帛
絕書權光弛燭天岱發靈宗河開寶崇丘淪鼎

振采泗淵雲皇王嶽摘藻

漢

弁角卽音栖翔

禁籞衮甲霜味翺舞川肆榮泉流鏡後昭河源

故以波沸外關雲蒸內澤若其雪趾青毳玄文

朱綵日月郊甸擇木弄音重以榮露騰軒蕭雪

掩閣鎬穎葦萌移華淵禁山興竚衡雲鵲竦翼

海鰈泳流江茅吐蔭校書之列仰筆以飾辭濟

代之蕃獻邑以待禮豈非神颺氣昌物瑞雲照

蒲軒龜軫

泉

淳芳太宰江夏王臣義恭咀道

遵英栖奇麗古該潤圖史施詳閱載表以功懋

往初德耀炎昊升文中岱登牒天關耀冠榮名
摘振聲號而道謙稱首禮以虛挹將使玄祇缺
觀幽瑞垂期梁甫無盛德之容介丘靡升聞之
響加窮泉之野獻八代之駟交木之鄉莫絕金
之枯肅靈重表珍符兼貺伏惟陛下謨詳淵載
衍屬休章依徵聖靈潤色聲業諏辰稽古肅齊
警列儒僚展采禮官相儀懸蕤動音洪鍾竦節
陽路整衛正途清禁於是績環珮端玉藻鳴鳳
竚律騰駕流文閒綵比象之容昭明紀數之服

徽焯天陣容藻神行翠蓋懷陰羽華列照乃詔
聯事掌祭賓客贊儀金支宿縣鋪石潤響命五
神以相列闢九關以集靈驚衛兵而開雲先雨
祇以灑路霞凝生闕煙起成宮臺冠丹光壇浮
素靄爾乃臨中壇備盛禮天降祥錫壽固皇根
谷動神音山傳稱響然後辨年間老陳詩觀俗
歸薦告神奉遺清廟光美之盛彰乎萬古淵祥
之烈濫乎無窮豈不盛歟臣等生按昌辰肅懋
明世東教管聞未足言道且章志涇徽代徃淪

絕拘採遺文辯明訓誥

遙訪鄒魯草滕

書堙王之禮具竦石繩金之儀和芝潤瑛鐫璽
乾封懼弗軌屬上徽燁當王則謹奉儀注以聞

封皇弟奏

臣聞桐圭睦親書河汾之策賜帶懷賢敬東平
之祚諒以訓經終始義洽垣墉第某皇弟等器
彩明敏令識頴悟並宜憲章前典光啓祚宇作
屏王室式雍帝載臣等參議可封郡王

改封郡長公主奏

臣聞爵厚懿戚國之恒典景祚既新禮與時渥
永興等七公主可封郡長公主

謝光祿集卷之三

宋陳郡謝莊希逸著

明閩漳張燮紹和纂

章

爲比中郎謝兼司徒章

臣聞燮理陰陽寅亮天地弗惟其官無人則闕
司徒掌敷五教職擾兆民豈悟乾靈罔匱光渥
方闕不次之任殊絕藩岳豈可權尸三事假備
六符慙震周廻顧步交悸

爲北中郎拜司徒章

不爲震施罔匿鴻慶方稠燹調之重遂臻非據
智小謀大周易興規少陽微暄有鑒前史辨其
動植布其安擾以倡九牧阜成王教豈臣眇末
所能克荷

啓事

與世祖啓事

賊劬自絕於天裂冠毀冕窮弑極逆開闢未聞
四海泣血幽明同憤奉三月二十七日檄聖迹
昭然伏讀感慶天祚王室叡哲重光殿下文明
在獄神武居陝肅將乾威龔行天罰滌社稷之
仇雪華夷之恥使弛墜之構更獲締造垢辱之
昨復得明目伏承所命柳元景司馬文恭宗懿
沈慶之等精甲十萬已次近道殿下親董銳旅

授律繼進荆鄢之師岷漢之衆舳艫萬里旌旆
虧天九土冥符群后畢會今獨夫醜類曾不盈
旅自相暴殄省闕橫流百僚屏氣道路以目檄
至輒布之京邑朝野同欣里頌塗歌室家相慶
莫不望景聳魂瞻雲佇足先帝以日月之光照
臨區寓風澤所漸無幽不洽況下官世荷寵靈
叨恩踰量謝病私門幸免虎口雖志在投報其
路無由今大軍近次永清無遠欣悲踊躍不知
所裁

牋

與大司馬江夏王義恭牋

下官凡人非有達鑒異識俗外之志實因羸疾
常恐奄忽故少來無意於人間豈當有心於崇
達邪頃年乘事回薄遂果饗非次旣足貽誚明
時又亦取愧朋友前以聖道初開未遑引退及
此諸憂事寧方陳微請款志未伸仍荷今授被
恩之始具披寸心非惟在已知尤實懼塵穢彝
序稟生多病天下所悉兩臂癰疾殆與生俱一

月發動不減兩三每至一惡痛來逼心氣餘如
經利患數年遂成痼疾吸吸噉噉常如行尸恒
居死病而不復道者豈是疾痊直以荷恩深重
思答殊施牽課厓瘵以綜所忝眼患五月來便
不復得夜坐恒閉帷避風日晝夜昏昏爲此不
復得朝謁諸王慶弔親舊唯被勅見不容停耳
此段不堪見賓已數十日持此苦生而使銓綜
九流應對無方之訴實由聖慈罔已然當之信
自甚劇若才堪事任而體氣休健承寵異之遇

處自效之塗豈苟欲思閒辭事邪家素貧弊宅
舍未立兒息不免僮羈而安之若命寧復是能
忘微祿正以復有切於此處故無復他願耳今
之所希雖在小閑下官微命於天下至輕在已
不能不重屢經披請未蒙哀恕良由誠淺辭訥
不足上感家世無年亡高祖四十曾祖三十二
亡祖四十七下官新歲便三十五加以疾患如
此當復幾時見聖世就其中煎懷若此實在可
矜前時曾啓願三吳勅旨云都不須復議外出

莫非過恩然亦是下官生運不應見一閑逸今
不敢復言此當付之來生耳但得保餘年無復
物務少得養疴此便是志願永畢在衡門下有
所懷動止必聞亦無假居職患於不能禪補萬
一耳識淺才常羸疾如此孤負王上擢授之恩
私心實自哀愧入年便當更申前請以死自固
但庸近所訴恐未能仰徹公恩矧弘深粗照誠
懇願侍坐言次賜垂拯助則苦誠至心庶獲哀
允若不蒙降祐下官當於何希冀邪

仰憑愍察
願不垂愍

書

爲朝士與袁顗書

夫夷陂相因興革遞歟或多難而固其國或殷憂而啓聖明此旣著於前史亦彰於聞見王室不造昏凶肆虐神鼎將淪宗稷幾泯幸天未亡宋乾曆有歸主上體自聖文繼明作睿而辱均庸里屯踰夏臺旣天地俱憤義勇同奮尅殄鯨鯢三靈更造應天順民爰集寶命四海屬息有之歡華戎見來蘇之泰吾等獲免刀鋸僅全首

領復身奉惟新命承亨運緩帶談笑擊壤聖世
汝雖劬勞于外跡阻京師然心期所寄江漢何
遠自九江告變皆謂鄧氏狂惑比日國言籍籍
頗塵吾子道路之議豈其或然聞此之日能無
駭惋凶人反道敗德日夜滋深昵近狡慝取謀
豺虎非惟毒流外物惡積中朝乃欲毀陵邑虐
崇憲燒宗廟鹵御物然後蕩覆京都必使蘭蕕
俱盡自非聖上廟筭靈圖俛睂遜避維持內外
擁衛臣下則赤縣爲戎百姓其魚矣此事此理

寧可孰念旣天道輔順謳歌有奉高祖之孫文
皇之子德洞九幽功貫三曜匡拯家國提毓黔
首若不予民南面將使神器何歸而羣下構慝
妄生窺覲成軫惑燕貫高亂趙讒人罔極自古
有之汝中京冠冕儒雅世襲多見前載縣鑒忠
邪何遠遺郎中之清軌近忘太尉之純槩相與
或羣從舅甥或姻婭周款一旦胡越能無悵恨
若疑誰所至邪諛無窮汝當誓衆奮戈翦此朝
食若自延過聽迷塗未遠聖上臨物以仁接下

以愛豈直雍齒先封乃當射鉤見相矣當由力
窘跡屈丹誠未亮邪跂予南服寤寐延首若反
棹泐流歸誠鳳闕錫圭開寓非爾而誰吾等竝
過荷曲慈俱叨非服紆金拖王改觀蓬門入奉
舜禹之渥出見義唐之化雍容榆楊信白駒空
谷之時也奈何毀擲先基自蹈凶戾山門蕭瑟
松庭誰掃言念楚路豈不思父母之邦幸納惡
石以蠲美疾裁書表意爾其圖之

昨還牀

弟昨還方承一日忽患悶當時乃爾大惡殊不
易追企恒想諸治昨來已漸勝眠食復云何頃
日寒重春節至居患者無不增動今作何治眼
風不異耳指遺承問謝莊白呈左僕射

議

索虜互市議

臣愚以爲獯獫棄義唯利是視關市之請或以
覲國順之示弱無明柔遠捍而觀釁有足表疆
且漢文和親豈止彭陽之寇武帝脩約不廢馬
邑之謀故有餘則經畧不足則閉關何爲屈冠
帶之邦通引弓之俗樹無益之軌招塵黷之風
交易爽議旣應深杜和約詭論尤宜固絕臣庸
管多蔽豈識國儀恩誘降逮敢不披盡

贊

竹贊

瞻彼中唐綠竹猗猗貞而不介弱而不虧杳裊
人圃蕭瑟雲崖推名楚潭美質梁池

哀策文

宋孝武帝哀策文

應門洞望馳道南除叢塗已撤鬱壘將虐哀子
嗣皇帝憊標池綽周遑旌軫攀七緯之崩淪勵
三靈之徂盡百神慕而行雲沉萬國哀而素霜
實衣冠緬邈弓劍不追敢緝謳頌髣髴希夷其
辭曰

樞電皇根月瑤國緒胤裔丹陵蟬聯華渚二后
在天大行纂武克睿克聖重規襲矩昭昭金式

言方月
明明玉溫望雲其遠就日其尊雨零露湛冬暖
春暄聲芳納麓道昭寶門上德無稱至功不器
怡悵四始優遊六位綴響蘭深緝言瓊秘悠哉
梁踐眇焉汾肆敬業開寓離經作翰鴻起荆河
鸞遊楚漢泗濱霑明江區承奐陝左清郊棠陰
虛館地維不紐乾綱馳機義庭薄蝕紫路流飛
泣血泚淚顧瞻川沂季貫樞極義震寰圉誓鉞
皇郊韶師牧甸七景締華五雲卷煽雪怨園邑
掃恥瀛縣啓聖宸蓋集寶龍見王室多故國步

方塞淮濟裂冠江荆毀冕東楚亂常西華啓黶
動筭揮圖爰戡爰剪浹宙斯澄綿區咸鏡脩風
曉逸德星夕映潯露飛甘舒雲結慶禎被動植
信泊翔泳快禮克宜墜章必構方堂饗極圓流
肆胃南轡郊宮北清靈囿瑤軒春藉翠華冬狩
經緯窮文克定盡武部上呈祥介丘載佇在盈
念冗成功弗處榮鏡中世鳥奕前古睿業初遠
鴻化方亭丹雲承日素景騰星玉几去襲綴衣
在庭辭重陽之昭昭降大夜之冥冥氣貿炎涼

史詔龜筮文物空嚴鑾和虎衛動蜃輅之逶迤
顧璧羽之容裔出國文而分天馳向關途而異
身世龍旌鬱而青槐遠落霞照而白楊翳觀初
霜之變條聽秋風之下帶橋山緬雲穀林虧日
輦道結寒松庭盡密芝蓋迫軒上驤脊轡萬寓
肅其比輶靈阿聞其深隘南維有時傾離光不
常鏡騰英聲與茂實方流華於舞詠

皇太子妃哀策文

楹凝桂酒庭肅龍輶風吹國輅雲起郊門皇帝
傷總繆之掩絳悼副禕之滅華行光旣宴長河
又斜顧而言曰璇璫有毀郁烈無湮翦素裁簡
授之史臣其辭曰

霍岫虧天潛流凝漢祥發桐珪慶昭金筭毓景
帝里飛芳戚閑秘儀施谷升音集灌月晷幾望
娣袂維良釋幃春宮承飾少陽五葉衍藻四訓
抽光歲蕤蕙振婉變瓊相清徽就遠禮殄方博

臨華罷翠當曄收蘭複殿生響長廡結寒節移
虛饋氣變容衣中庭草暖階上螢飛傷縈里第
痛溢朝闌霜侵燭昧風密帷淒驚葭夕轉龍驤
夜嘶筵旣訣兮奠旣徹背青闕兮去神閨旌掩
鬱而還泛蓋透遲而顧低素紉歛維華幘解馭
山燧恒陰松阿不曙離天渥兮就銷沈委白日
兮卽冥暮菊有秀兮蘅有芬德方遠兮聲彌樹

宣貴妃謚冊文

維年月日皇帝曰咨故淑儀殷氏惟爾含徽挺
茂爰光素里友琴流荇實華紫掖奉軒景以柔
明登譽處椒風以婉變升名幽閑之範日藹層
闈繁祉之慶方崇蕃世而當春掩藻中波滅源
朕用震悼傷于厥心松區已翦泉冥將墜宜有
旌德第行式衍聲芳今遣某官集冊告謚曰宣
魂而有靈尙茲寵渥嗚呼哀哉

誄

孝武宣貴妃誄

惟大明六年夏四月壬子宣貴妃薨律谷罷媛
龍鄉輟曉照車去魏連城辭趙皇帝痛掖殿之
既闐悼泉途之已宮巡步檐而臨蕙路集重陽
而望椒風嗚呼哀哉天寵方隆王姬下姻蕭雍
揆景陟岵爰臻國軫喪淑之傷家凝實妣之怨
敢撰德於旂旒庶圖芳於鐘萬其辭曰

玄丘煙煴瑤臺降芬高唐漂雨巫山鬱雲誕發

蘭儀光啓玉度望月方娥瞻星比婺毓德素里
棲景宸軒處麗締綌山懋蘋蘩脩詩賁道稱圖
照言翼訓如慳贊軌堯門綢繆史館容與經闡
陳風緝藻臨彖分微游藝殫數撫律窮機躊躇
冬愛怙悵秋暉展如之華實邦之媛敬懃顯揚
肅恭崇憲奉榮維約承慈以遜逮下延和臨朋
違怨祚靈集祉慶藹迎祥皇胤璿式帝女金相
聯跼齊頤接萼均芳以藩以牧燭代輝梁眊朔
書氛觀臺告祿八頌扇和六祈輟滲玕琬滅容

輦翟毀柱掩絳瑤光收華紫禁嗚呼哀哉帷軒
夕改輶輅晨遷離宮天遠碧燄雲懸靈衣虛襲
組帳空煙巾兒餘軸匣有遺絃嗚呼哀哉移氣
朔分變羅紈白露凝兮歲將闌庭樹驚兮中帷
響金缸暖兮玉座寒純孝擗其俱毀共氣摧其
同爨仰昊天之恩報怨飢風之徒攀茫昧與善
寂寥餘慶喪過于哀棘實滅性世覆冲華國虛
淵今嗚呼哀哉題湊旣肅龜筮旣辰階撤兩奠
庭引雙輜維慕維愛曰子曰身慟皇情於容物

崩列辟於上旻崇徽章而出宸旬照殊策而去
城闐嗚呼哀哉經建春而右轉循閭闔而經浹
旌委鬱於飛飛龍透遲於步步鏘楚挽於槐風
過邊蕭於松霧涉姑射而環迴望樂池而顧慕
嗚呼哀哉晨韞解鳳曉蓋俄金山庭寢日墜路
抽陰重扃閉兮燈已黯中泉寂兮此夜深銷神
躬於壤表散靈魄於天溥響乘氣兮蘭馭風德
有遠兮聲無窮嗚呼哀哉

黃門侍郎劉琨之誄

秋風散兮涼葉稀
出吳洲兮謝江畿
瞻國門兮聳雲路
睇舊里兮驚客衣
魂終朝而三奪心
一夜而九飛過
建春兮背闕庭
歷承明兮去城輦
旌徘徊而北係轡
逶遲而不轉挽掩
遽而辛嘶
騷含愁而臨俛
顧物色之共傷
具車徒之相滋

墓誌銘

豫章長公主墓誌銘

稟中樞之照體星軒之華肅恭在國掖庭欽其
風恪勤衡館庶族仰其德

神葉靈條爰自帝堯文信啓魯肇京于楚宵燭
載照娥英是從婉婉締結優柔肅雍蘅蕙有寶
金碧不枯泉庭一夜里館長蕪

司空何尚之墓銘

遠源長瀾自晉徂韓潛川韜玉霍岫騰鑾處華
民瞻出光帝難寂寞壽仁茫昧報施調於餘歸
經難褰寄瞻映流芳煙熅作義

附錄

謝莊傳

梁沈約

謝莊字希逸陳郡陽夏人太常弘微子也年七歲能屬文通論語及長韶令美容儀太祖見而異之謂尚書僕射殷景仁領軍將軍劉湛曰藍田出玉豈虛也哉初爲始興王濬後軍法曹行參軍轉太子舍人廬陵王文學太子洗馬中舍人廬陵王紹南中郎諮議參軍又轉隨王誕後軍諮議並領記室分左氏經傳隨國立篇製本

方丈圖山川土地各有分理離之則州別郡殊
合之則寓內爲一元嘉二十七年索虜寇彭城
虜遣尙書李孝伯來使與鎮軍長史張暢共語
孝伯訪問莊及王徽其名聲遠布如此二十九
年除太子中庶子時南平王鑠獻赤鸚鵡曾詔
羣臣爲賦太子左衛率袁淑文冠當時作賦畢
高祖示莊莊賦亦竟淑見而歎曰江東無我卿
當獨秀我若無卿亦一時之傑也遂隱其賦元
凶弒立轉司徒左長史世祖入討密送檄書與

莊令加改治莊遣腹心奉啓事密詣世祖世祖
踐阼除侍中索虜求通互市莊議應固絕時竟
陵王誕當爲荊州徵丞相荊州刺史南郡王義
宣入輔義宣固辭不入而誕克日下船莊以丞
相既無入志驃騎發便有期於事不便世祖乃
申誕發日義宣竟不下上始踐阼下節儉詔書
莊慮此制不行時以爲言孝建元年遷左衛將
軍初世祖嘗賜莊寶劔莊以與豫州刺史魯爽
送別爽後反叛世祖因宴集問劔所在答曰昔

與魯爽別竊爲陛下杜郵之賜上說當時以爲
知言時按才路陞莊表請曾命大臣各舉所知
有詔莊表如此可付外詳議事不行其年拜吏
部尙書莊素多疾不願居選部與大司馬江夏
王義恭歲自陳三年坐辭疾多免官大明元年
起爲都官尙書奏改定刑獄上時親覽朝政以
吏部尙書選舉所由欲輕其勢力下詔曰八柄
馭下以爵爲先九德咸事政典居首銓衡治樞
興替攸寄頃世以來轉失厥序徒秉國鈞終貽

權謗今南北多士勲勤彌積物情善否實繫斯
任官人之詠維聖克允則哲之美粵帝所難加
澆季在俗讓議成風以一人之識當羣品之誚
望沈浮自得庸可致乎吏部尙書可依郎分置
并詳省閑曹又別詔太宰江夏王義恭曰分選
詔日出在朝論者亦有同異誠知循常甚易改
舊生疑但吏部尙書由來與錄共選良以一人
之識不辨洽通兼與奪威權不宜專一故也前
述宣先旨敬從來奏省錄作則永貽後昆自此

選舉之要唯由元凱一人若通塞乖衷而訴達者渺且違令與物理至隔閡前王盛主猶或難之況在寡闇尤見其短又選官裁病卽嗟謂滿道人之四體會盈有虛旬日之間便至怨詈況實有假託不由寢頓者邪一詰不前貧苦交困則兩邊致患互不相體校之以實益有可哀若職置二人則無此弊兼選曹樞要歷代斯重人經此職便成貴塗已心外議咸不自限故范曄魯爽舉兵滅門以此言之實由榮厚勢驅殷繁

所至設可擬議此授唯有數人本積歲月稍加
引進而理無前期多生慮表或嬰艱抱疾事至
回移官人之任決不可闕一來一去向人已周
非有黜責已貴難賤旣成妨長寘之無所盛衰
遞襲便是一段世臣相處之方臣主生疑所以
彌覺此職宜在降階監令端右足處時望無人
則闕異於九流今但直銓選部有減前資物情
好猜橫立別解本旨向意終不外宣唯有從郎
分置視聽自改選旣輕先民情已變有堪其任

大展遷回兼常之宜以時稍進本職非復重官
可得不須帶帖數過居之盡無貽怪自中分荆
揚子時便有意於此正訝改革不少容生駭惑
爾來多季欲至歲下處分會何便致故應有親
人故近因此施行本意詔文不得委悉故復紙
墨具陳於是置吏部尙書二人省五兵尙書莊
及度支尙書領領之並補選職遷右衛將軍加
給事中時河南獻舞馬詔羣臣爲賦莊所上爲
佳又使莊作舞馬歌令樂府歌之五年又爲侍

中領前軍將軍于時世祖出行夜還敕開門莊
居守以榮信或虛執不奉旨須臾詔乃開上後
因酒讌從容曰卿欲效邳君章邪對曰臣聞蒐
巡有度郊祀有節盤于遊田著之前誠陛下今
蒙犯塵露晨往宵歸容恐不逞之徒妄生矯詐
臣是以伏須神筆乃敢開門耳改領遊擊將軍
又領本州大中正晉安王子勛征虜長史廣陵
太守加冠軍將軍改爲江夏王義恭太宰長史
將軍如故六年又爲吏部尙書領國子博士坐

選公車令張奇免官事在顏師伯傳時比中郎
將新安王子鸞有盛寵欲令招引才望乃使子
鸞援莊爲長史府尋進號撫軍仍除長史臨淮
太守未拜又除吳郡太守莊多疾不樂去京師
復除前職前廢帝卽位以爲金紫光祿大夫初
世祖寵姬殷貴妃薨莊爲誅云贊軌堯門引漢
昭帝母趙婕妤好堯母門事廢帝在東宮銜之至
是遣人詰責莊曰卿昔作殷貴妃誅頗知有東
宮不將誅之或說帝曰死是人之所同政復一

徃之苦不足爲深固莊少長富貴今且繫之尙
方使知天下苦劇然後殺之未晚也帝然其言
繫於左尙方太宗定亂得出及卽位以莊爲散
騎常侍光祿大夫加金章紫綬領尋陽王師頃
之轉中書令常侍王師如故尋加金紫光祿大
夫給親信二十人本官並如故泰始二年卒時
年四十六追贈右光祿大夫常侍如故謚曰憲
子所著文章四百餘首行於世長子颺晉平太
守女爲順帝皇后追贈金紫光祿大夫

謝莊傳

唐李延壽

莊字希逸七歲能屬文及長韶令美容儀宋文帝見而異之謂尚書僕射殷景仁領軍將軍劉湛曰藍田生玉豈虛也哉爲隨王誕後軍諮議領記室分左氏經傳隨國立篇製木方丈圖山川土地各有分理離之則州郡殊別合之則宇內爲一元嘉二十七年魏攻彭城遣尚書李孝伯與鎮軍長史張暢語孝伯訪問莊及王微其名聲遠布如此二十九年除太子中庶子時南

平王鑠獻赤鸚鵡曾詔羣臣爲賦太子左衛率
袁淑文冠當時作賦畢示莊及兄莊賦歎曰江
東無我卿當獨秀我若無卿亦一時之傑遂隱
其賦元凶弑立轉司徒左長史孝武入討密送
檄書與莊令加改正宣布之莊遣腹心門生具
慶奉啓事密詣孝武陳誠及帝踐祚除侍中時
魏求通互市上詔羣臣博議莊議以爲拒而觀
釁有足表強驃騎竟陵王誕當爲荊州徵丞相
荊州刺史南郡王義宣入輔義宣固辭不入而

誕便尅日下船莊以丞相旣無入志而驃騎發
便有期如似欲相逼切帝乃申誕發日義宣竟
亦不下尋建元年遷左將軍莊有口辯孝武嘗
問顏延之曰謝希逸月賦何如荅曰美則美矣
但莊始知隔千里今共明月帝召莊以延之荅
語語之莊應聲曰延之作秋胡詩始知生爲久
離別沒爲長不歸帝撫掌竟日又王玄謨問莊
何者爲雙聲何者爲疊韻荅曰玄護爲雙聲礫
偏爲疊韻其捷速若此初孝武嘗賜莊寶劍莊

以與豫州刺史魯爽後爽叛帝因宴問劍所在
荅曰昔以與魯爽別竊爲陛下杜邨之賜上甚
悅當時以爲知言于時搜才路狹莊表陳求賢
之義初文帝世限年三十而仕郡縣六周乃選
代刺史或十年餘至是皆易之仕者不拘長少
莅人以三周爲滿宋之善政於是乎衰是年拜
吏部尙書莊素多疾不願居選部與大司馬江
夏王義恭牋自陳三年坐疾多免官大明元年
起爲都官尙書上時親覽朝政慮權移臣下以

吏部尙書選舉所由欲輕其勢力二年詔吏部
尙書依部分置并詳省閑曹又別詔太宰江瓊
王義恭曰吏部尙書由來與錄共選良以一人
之識不辨洽通兼與奪威權不宜專一故也於
是置吏部尙書二人省五兵尙書莊及度支尙
書顧顗之並補選職遷左衛將軍加給事中時
河南獻舞馬詔羣臣爲賦莊所上甚美又使莊
作舞馬歌令樂府歌之五年又爲侍中領前軍
將軍時孝武出行夜還敕開門莊居守以榮信

或虛須墨詔乃開上後因宴從容曰卿欲効邳君章邪對曰臣聞蒐廵有度郊祀有節盤于遊田著之前誠陛下今蒙犯塵露晨徃宵還容致不逞之徒妄生矯詐臣是以伏須神筆六年又爲吏部尙書領國子博士坐選公車令張奇免官事在顏師伯傳後除吳郡太守前廢帝卽位以爲金紫光祿大夫初孝武寵姬殷貴妃薨莊爲誅言替軌堯門引漢昭帝母趙婕妤堯母門事廢帝在東宮銜之至是遣人詰莊曰卿昔作

殷貴妃誅知有東宮不將誅之孫奉伯說帝曰
死是人之所同政復一往之苦不足爲困莊少
長富貴且繫之尙方使知天下苦劇然後殺之
未晚帝曰卿言有理繫於左尙方明帝定亂得
出使爲赦詔莊夜出署門方坐命酒酌之已微
醉傳詔立待詔成其文甚工後爲尋陽王師加
中書令散騎常侍尋加金紫光祿大夫給親信
二十人卒贈右光祿大夫諡憲子所著文章四
百餘首行於世五子颺趾顯從淪世謂莊名子

以風月景山水颺位晉平太守女爲順帝皇后
追贈金紫光祿大夫

與謝尚書莊三連句

宋鮑照

霞輝分澗朗日靜兮川澄風輕桃欲開露重蘭
未勝水光溢兮松霧動山煙疊兮石露凝掩映
辰物絲連綿夕羽興

遺事

謝莊代顏峻爲吏部尙書峻容貌嚴毅常有不
犯之色莊風姿溫美人有喧訴常歡笑荅之故
時人語曰顏吏部暝而與人官謝吏部笑不與
人官

宋武選侍中四人並以風貌王或謝莊爲一雙

阮韜何偃爲一雙

南史王
延之傳

殷淑儀薨謝莊作哀策文奏之帝卧覽讀起坐
流涕曰不謂當今復有此才都下傳寫紙墨爲

貴

南史嚴叔儀傳

謝公巖卽謝夷逸遊處希逸爲江夏王義恭長史隨鎮襄陽性耽山水每政隙卽出遊于此至今稱謝巖矣

集評

謝希逸詩氣候清雅不逮王袁然興屬閒長良

無鄙促

詩品

顏延謝莊尤爲繁密